



UPA 2026/175

27/5-2026

Karen Marie Kyed Frederiksen

**Kulturikkut ingerlatsineq sunngiffimmilu sammisassaqtitsineq pillugit Inatsisartut inatsisaata allangortinneqarnissaa siunertaralugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsimmi piumasaqaataasut appartinnerisigut kommunini inoqarfiit ukiut tamarmik kulturikkut ingerlatsineq sunngiffimmilu sammisassaqtitsineq pilersaarusiortalissavaat.**

(Inatsisartunut ilaasortaq Mimi Karlsen, Inuit Ataqatigiit)

(Siullermeerineq)

Inatsisartunut ilaasortap Mimi Karlsenip siunnersuuteqarneranut qujanaq.

Sunngiffimmi ilinniartitaanerit, kulturimut neqeroorutit, sunngiffimmilu ataatsimoornerit pingaarutilimmik isumallit nalitoorujussuupput. Minnerunngitsumik inoqarfinni mikinerni periarfissat ikinnerusinnaatillugit, neqeroorullu pitsaasoq ilinniarnermik, atugarissaarnermik, ataqatigiinnermillu pilersitseqataasinnaatillugu.

Tamanna pillugu najukkami sammisassanik pilersitsiniarnerup ajornannginnerulersinneqarnissaanik kissaateqarneq Demokraatit iluaraat. Inuit nutaanik ilikkagaqarnissaminnut, assatik atorlugit suliaqarnissaminnut, piginnaasaminnik annertusaanissaminnut, allatigullu ataatsimoornerit peqateqarnissaminnut periarfissinneqaraangata pitsaavoq. Tamanna pitsaasumik inuuneqalersitsisinnaavoq, najukkamilu pimoorussinermut nukittorsaaqataasinnaalluni.

Taakkua oqaatigereerlugit maluginiarparput, sunngiffimmi atuartitsineq meeqqanut, inuusuttunut, inersimasunullu siammasissumik neqeroorutit siunnerfeqartoq. Pingaarnersiulluarnissarput Demokraatinut aalajangiisuvoq. Sunngiffimmi neqeroorutit, ilinniarneq, atugarissaarneq, ineriartornerlu pineqartillugit isumaqarpugut pingaarnertut ukkataq meeqqaniillunilu inuusuttuniittariaqartoq. Tassani suliniutaasoq siunissami pingaaruteqarnerpaassaaq. Tassani atugarliornissaq pinaveersaartissinnaavarput, ataatsimoornerit annertusarsinnaavagut, meeqqallu aamma inuusuttut amerlanerusut atuareernerup kingorna ataatsimoornerit isumalimmik peqataanissaannut periarfissisinnallutigit.

Tamanna pillugu isumalluutinik siammaavallaarnissarput mianersuutissavarput. Inersimasut neqeroorutitut isumalinnut aamma peqataasinnaanerat soorunalimi pitsaavoq, kisianni pisortani isumalluutit killeqarput. Tamanna pillugu malittarisassanik sakkukilliliisoqassappat tamanna meeqqat, inuusuttullu sunngiffimmi ataatsimoornerit pisariaqartitsinerpaat ukkatarineqarunnaannginnissaat qulakkeertariaqarparput.

Pissutsit assigiinngitsut aamma ersarinnerusumik misissorneqartariaqarput. Soorlu inoqarfinnut tamanut ukiumoortumik pilersaarusiortarnissamut kommunit pisariaqartunik isumalluuteqarnerisut, peqataasussat

UPA 2026/175

J.nr 00.00.00/26FM-LABU-00175

Qupp. 1



ikinnerunissaannik piumasaqaateqarneq amerlanerusunik neqerooruteqarnermik ilumut kinguneqassanersoq imaluunniit init, ilinniartitsisut, aningaasaqarneq, najukkami aaqqissuussineq pillugit allanik akimmiffissaqarnerseq.

Tamanna pillugu ataatsimiititaliami suliarineqarnissaa Demokraatit akuersaarpaat. Siunertaq pitsaasoraarput, siunnersuutilli qanoq piviusunnngortinneqarsinnaanissaanut, meeqqallu aamma inuusuttut sulii pingaartinneqarnerpaallutik pingaarnersiorneqarnissaat qanoq qulakkiissaneripput pillugu ersarissumik naliliisoqassasoq kissaatigaarput.

Taamatut oqaaseqarlunga Demokraatit innersuussutigaa siunnersuut Kultureqarnermut, Ilinniartitaanermut, Ilisimatusarnermut, Ilageeqarnermullu Ataatsimiititaliami nangillugu oqaluuserineqarnissaanut ingerlateqqinneqassasoq.